

公開組

冠軍

【春望】陳冠夫

轉燭春韶怯薄寒，南溟氛霧感無端。
陸沉陡覺天猶醉，海沸翻疑淚欲乾。
百劫看殘人世換，一廬居靜客心安。
微茫漸起浮生夢，耿耿疏星獨倚闌。

亞軍

【霧香江】梁朗秋

鼇海冥濛且莫歎，煙籠島上尚漫漫。
遠山卻比廬山杳，複道紛如蜀道難。
儘有園林容豹隱，已無城郭供龍蟠。
臨流傑閣皆新築，半帶陰氛半可觀。

季軍

【抵加有感】王忠義

春歸秀野夏猶寒，風雨無端入眼酸。
去國艱難同苟活，賦閒容易只尸餐。
過淮枳變繁香散，嘆鳳時窮大道殘。
我本天涯求勝著，莫從一局較悲歡。

優異獎

(排名按姓氏筆畫序)

【永憶】何永釗

每對華燈深所思，負人心事在猶疑。
艱難待取黃昏約，惆悵歌殘白紵詩。
永憶當筵眉似畫，坐成獨夜鬢如絲。
無台避得煙花債，休詡河陽是可兒。

【讀詩管窺】陳灼

棲身樂府興淋漓，彈指流光去莫追。
故友相尋頻入夢，江山無恙且論詩。
風雲氣少原疵病，兒女情多本礙時。
休歎飄零文字海，惜春還唱送春詞。

【過八仙嶺春風亭】黃文彬

野徑燒痕沒，山行仍屈盤。
新亭存典範，劫石證危安。
解識春風意，何傷世路難。
碑文供仰頌，映日有餘丹。

【初夏】潘女

又是清和四月時，郊遊涉處覺神怡。
春歸尚見花開徑，夏至猶多果掛枝。
風動新篁聲斷續，簾穿乳燕羽差池。
偶看路上趨炎客，汗滴如珠未覺疲。

【鄉思】羅忠

鄉雲翹首路漫漫，夕照樓頭獨倚欄。
酬世卻從忙裏過，治心猶寄淡中安。
卅年海角隨蓬轉，一夜燈前入夢難。
松菊幽貞三徑冷，思將寫作畫圖看。

公開組

特別獎

(排名按姓氏筆畫序)

【答友】何柏凌

瑣門夢自落江干，野性由來不耐官。
沉已無親需祿養，何堪忍愧廁儒冠。
一枝竹杖扶身穩，三尺書檠照影寒。
身在名場心已寂，誤公猶作俊才看。

【登春風亭】劉惠中

春風亭畔綠纒纒，山色依稀復舊觀。
嫩草如茵承細雨，蒼松似蓋護芳蘭。
仙姑有憾春愁重，巨石無言暮氣寒。
最是碑文情義切，矇矓淚眼幾回看。

學生組

冠軍

【春末懷友】

陳冠璋 下葵涌官立工業中學
三載愁何已，情深夢不支。
樓臺春寂後，風雨夜闌時。
北海兼天遠，南窗得睡遲。
明年花更好，相會自能期。

亞軍

【詠轅杜鵑】

施小玲 香港中文大學
杜鵑生五月，蕾綻滿園中。
綠草成幽徑，黃鸝叫綺叢。
花間迴彩蝶，樓上隔春風。
料得明年蕊，紛紛向北紅。

季軍

【青馬大橋】

蕭志勇 香港樹仁學院
遙看路三千，潛龍一線牽。
帆隨風逐浪，車似箭離弦。
傑構跨青馬，雄心壯海天。
徘徊思泚筆，吐氣欲飛鸞。

學生組

優異獎

(排名按姓氏筆畫序)

【冬懷】

司徒志雄 香港樹仁學院

朔風吹大地，百木與天爭。
薄袂登山急，殘枝倚路橫。
冬時寒意盛，海畔客情生。
坐想人間事，迴春氣自平。

【黃昏】

李卓偉 荃灣官立中學

日暮正思歸，丹霞帶落暉。
風多波浪急，人少語聲稀。
海上孤帆盡，天邊一雁飛。
平生惟好靜，對此漸忘機。

香港公共圖書館
HONG KONG PUBLIC LIBRARIES

優異獎

(排名按姓氏筆畫序)

【慈善伶王自白歌】

張佩君 順德聯誼總會梁銑珦中學

閻王邀獻技，悲唱恨無窮。
誤困紅塵網，誰憐白髮翁。
齒唇爭勝負，骨肉決雌雄。
紙錠飄冥土，逍遙兩袖風。

【病起偶題】

陳婉君 香港樹仁學院

羣鶯催夢醒，綠柳拂閒門。
小病嗟長日，多情欲斷魂。
心猶憂百事，淚卻了無痕。
驟見桃花發，匡時念又存。